

Glenelg Adelaide - Esperance

Bevor mir üs uf dä Weg nach Westaustralie gmacht händ, sind mir nomal für 1 Nacht nach Glenelg gange und nomal poschtet. Denn isch es i eim Tag nach Port Augusta, s'letscht grössere Kaff, vor em „Nullarbor“! I säbärä Nacht isch's erst mal so richtig mega heiss gsii, sit i mit em Mami und Papi unterwegs bin. Sit dä Ameise, i minere Etage, schlaf ich jetzt bi ine une und es isch zwar platzmässig OK, aber wenn's so heiss isch, isch's fascht wie ihere Sauna! ☺ Jä nu, i ha dänn däfür am nächschte Tag, dä 1. Tag durs nichts, hinde ihne no chli pfüüselet! Isch zwar scho mega iidrücklich gsii, Landschaft's mässig, aber in bin so müed gsii, dass mich das i säbem Moment so ziemlich nid intressiert hät!

Es sind am 1. Tag 965 km gsii und am 2. Tag, gad nomal soviel. Also über 1900km und dem sägeds „Nullarbor plain“ ! Isch also wüekli Wüesti gsii! Zum Teil kei Bäum, uuströchnet, staubig, wieder mit Gstrüp, also es hät immer chli anders usgseh! Au Roadtrains, bis 52m langi Lastwäge, häts recht viel unterwegs gha. Es paar mini Käffer eifacht immer wieder es Roadhouse (Raststätt) ! Übernachtet händ mir ufeme Camping in Eucla und s'erscht mal händ mir da Kängis gseh, wo nid überfahre gsii sind! ☺

Nach 2 Tag und nachdem i no die länscht grad Strass vo Australie gfahre bin, 146.6km, sind mir endli in Esperance (Süd Westaustralie) aacho. Ha scho chli meh erwartet, aber leider isches nid so gsi! Zwar grösser als alles andere, wo mir i de letschte 2 Tag gseh händ, aber immer no es riise Kaff! Am erste Abig hät dä Papi no unbedingt wellä zum Resti laufe, hät sich aber Distanzmässig chli verschätzt und es sind denn hin und retour 6km gsii! Uffff! ☺ Am nächste Tag, nachdem mir, dä Tourist Drive gmacht händ und viele schööni Stränd gseh händ, sind mir bim Campingplatz no ad Beach chli go sünnele und bädele! Am Abig sind mir no bis am 11i, mit dä Nadja und em Thomas vo Nottwil, dusse ghocket händ Wii trunke und gschwätzt.

Esperance – Margaret River

Nach mä wiitere Tag Autofahre sind mir in Albany aacho und sind z'erst chli an Beach. Wär wunderschöön gsii und es hät unglaublich viel Muschle am Strand gha, aber es hät so fescht gwindet, dass mir gfrohre händ und zruigg zum Camping Pool sind! Nach wieder me super feine z'Nacht (isch scho chli en chääs jetzt han i so lang abgnoh und chum i Mama's Kuchi, wieder voll am inehaue), sind mir scho glii is Bett! Am nächschte Tag, sind mir Albany und d' Umgebige go aaluege! Z'erscht s'Anzar Mamorial (Australie und Newzealand Army Corps) dä Hafe, s'Museum vo Albany, „The Gape“ det isch's Wasser so ad Felse anegsprützt, e natürlichi Steibrugg und Walfangstation (oder zumindest vo usse, will dä litritt isch grausam tüür gsii) ! Denn sind mir innerhalb vo ca 1 Stund, nach Denmark gfahre! ☺ Isch unglaublich, eigentli in Australien, aber eifach so schnell nach Denmark! ☺ Dert sind mir denn erscht am Namittag acho, aber für en churze Trip a en wunderschöne Strand, häts denn scho no glanget! Leider häts au det uu g'windet, dass mir eifach es paar Surfer zueglueget händ!

Ufem Camping hät's ganz viel Papagaje gha, die sind wunderschöön gsii (rötlich grau) und die händ en riise lärme gmacht! Am nächschte Tag, sind mir z'erscht go d' Green

Pools aaluege (das isch enart wie es Pool am Strand, abgrenzt dur Stei am Meer). So chönt mer super det drinn bädele und s'Wasser hett eim so richtig aagmacht, aber leider hät's Wetter au hüt nid so wellä mitspiele und mir hend freiwillig uf's badä verzichtet! Denn isch's wiiter zum „Valley of the Giants“! Isch scho recht extrem wie sich da d'Umgebige verändert, wenn mer mit em Auto durefahrt! Det hät's am Strasserand überall Bäum gha und z.T. riise grossi! ☺ Im „Vally of the Giants“ hät denn u mega höchi Brugg i dä Bäum, wo mer bis 40m höch chunt und richtig merkt wie hoch die Bäum wüekli sind! Scho nume s'laufe uf dä Brugg isch mega läss und iidrücklich.

Am Abig sind mir denn wiiter nach Margaret River, wo's Kängi- Fleisch zum z'Nacht gäh hät (ich säg eu lecker!) und mir no es paarne Aussies bim Cricket hän chöne zueluege. Obwohl's au scho gnueg trunke gha händ, hät's doch no recht iidrücklich uf eus gwürkt! Am nächschte Tag isch es denn uf eusi buechet Wiitour gange, das isch echt lustig gsii! 4 Manne (inkl. Führer) und 12 Fraue! ☺ Nach verschiedene Wii – Farme und viel Wiiprobe, häts es Bush z' Mittag gäh! Das isch alles ganz interessant und fein gsii, usser e Paste wo er erst nachem probiere gseit hät, dass es Bushraupe dine hät. ☹ OK, muen zuegäh, wenn mers nid wüsst, wär's gar nid so gruusig gsii! Am Namittag händ mir nomal verschiedensti wii probiert und bidä letzte Wiifarm händ sich die einte denn scho nüm so richtig chöne konzentriere, 12 Fraue, also ei giggelete ☺ ! OK, au die einte Manne sind guet zwäg gsii und wo denn no Musik gloffe isch im Auto, hät dä Jeff alles gäh! Nach ere Schoggifabrik, Chäsfabrik und Photoshoting, sind mir denn wieder z'rugg zum Camping bracht worde und sind all froh gsii, mal chöne härälige! In Margaret River, sind mir am nächste Tag no chli go lädele (das g'heisst s'Mami vor allem) und denn isch's scho wiiter nach Busselton.